

佛說貧窮老公經

宋沙門釋慧簡譯

聞如是一時佛在舍衛國精舍中坐與二千比丘俱時有一貧窮老公年二百歲眉生秀毛耳出於頭齒如齊貝手過於膝貌而視之似如有相而貧窮辛苦衣不蓋形五體裸露腹恒飢虛行步時動小有氣息扶杖而來求欲見佛釋梵侍門勅不通之老公因大喚曰吾雖貧賤民之廝下千載有幸今得值佛欲問罪福求離衆苦我聞世尊仁慈普逮萬物蒙賴莫不受恩是以遠來乞一示見而卿斷我既違我願有誤聖意豈宜可爾乎佛以知之顧語阿難汝寧見長壽者年有相老公而罪未畢者乎阿難叉手白佛言安有相福者壽而有罹罪罹罪之人豈復有相今在何許

生所未見佛言近在門外釋梵斷之可喚使前於是老公匍匐寸進爲佛作禮悲喜交流而白佛言我生世不幸貧窮辛苦飢餓寒凍求死不得活無所賴人命至重不能自棄聞佛在世心獨歡喜晝夜發心願一奉顏由來十年今始得果向在門外久不得前計欲還去氣力不堪進退無路但恐命絕穢汙聖門重增其罪不悟天尊已哀矜之得蒙前進不奪本願如此而死無復恨矣惟欲速終畢罪後世願得垂恩施其上慧佛言人之受生生死因緣以多因緣致有罪根今我爲汝說其本源卿前世時生豪強大國明慧王家時爲太子憍貴非凡上爲父母所愛下爲臣民所敬用此恣意輕凌於人高目大視矜抗邈然財寶億萬皆是民物百姓貧弊皆坐課斂惟

知聚積財物不肯布施時有貧寒沙門名曰靜志從遠國來故往詣卿所求不多惟法衣耳而卿了不當接遇之甚惡既不乞衣又不與食空坐著前去復不聽晝夜七日水漿永絕亦有氣息命在轉燭而卿見此方大歡喜聚人看之以爲快樂邊有侍臣而諫卿曰太子莫爾沙門慈悲道德內合凍之不寒餓之不飢所以來乞欲爲福耳既不施與安可窮逼幸發遣之勿招其罪太子答曰此是何人詐稱道德試小困之纔令不死正爾放去無所憂也即便遣去驅逐出國未出國界十餘里中途遭飢賊欲殺噉之沙門言曰我貧凍沙門羸瘦骨立肉旣腥臊不中噉也空當見殺而無所任餓賊又曰我餓困累日但食土耳卿雖小瘦故是肉也終不相放但當就死

如此前却紛紜良久太子得知便往救曰我以不能乞其衣食寧當復令賊殺之耶賊見太子皆叩頭首過謝罪放沙門去時沙門者令彌勒菩薩是憍貴太子者今卿是也故卿今日受此貧窮之罪坐慳貪也所以得長壽者救活沙門之命也罪福報應亦如影響老公白佛去事已爾願畢於今乞得以垂殘之命得作沙門後生世世常侍佛邊佛言善哉應時老公鬚髮墮地法衣在身體氣強健耳目聰明即得上慧人三昧門以偈讚佛

我昔爲太子 不識仁義方 憍貴自放恣
恃爲大國王 自謂無罪福 此以可保常
豈悟生死對 於今受其殃 從罪復蒙福
得覩天中天 能脫既往罪 垂命入法門
永離慳貪心 長受智慧根 世世侍佛邊

保持萬劫存

於是老公比丘說是偈已禮佛而去

佛說貧窮老公經

第六

音釋

憊其季切 叛普半切 倅七內切 焯之藥切 礎
毛對切 沆何黨切 幟昌志切 鎛徒對切 抖擻
磨也 斗當口切 匍匐薄胡切 抖擻後切